

**UGOVOR O NABAVCI VIŠENAMJENSKOG HELIKOPTERA  
SA PRATEĆOM OPREMOM**

Ministarstvo unutrašnjih poslova Kantona Sarajevo, La Benevolencija 16, koje zastupa  
Ministar Admir Katica, (u daljem tekstu: Kupac)

SHOT d.o.o. Zenica, Zmajevačka cesta 55C, ID: 4218126090005, koje zastupa direktor  
Vedran Ključanin (u daljem tekstu: Dobavljač),

zaključili su:

## UGOVOR O NABAVCI VIŠENAMJENSKOG HELIKOPTERA SA PRATEĆOM OPREMOM

### Član 1. (Općenito)

Ministarstvo unutrašnjih poslova Kantona Sarajevo, kao Kupac, povjerava Dobavljaču robe i opreme SHOT d.o.o. Zenica, kao najpovoljnijem ponuđaču, a Dobavljač prihvata da za potrebe Kupca isporuči civilni helikopter i opremu prema tehničkim specifikacijama i uslovima iz tenderske dokumentacije proizvođača BELL Textron Inc. (u daljem tekstu: Proizvođač).

Ugovor se zaključuje u skladu sa uslovima iz tenderske dokumentacije postupka javne nabavke, broj: JN-01-11-4-5100 i ponudom Dobavljača broj 23-218-KT, te Odluke o izboru ponuđača i nabavci helikoptera za potrebe Ministarstva unutrašnjih poslova Kantona Sarajevo, broj: 05-1-30-1-3436-15 od 12.03.2024. godine.

U skladu sa odredbama člana 99. Zakona o obligacionim odnosima („Službene novine FBiH“, br. 29/03 i 42/11), ugovorne strane su saglasne da se ugovorne obaveze primjenjuju onako kako glase, a u slučaju nemogućnosti saglasne su da se primjeni dispozitivni karakter odredaba, u skladu sa odredbama člana 20. Zakona o obligacionim odnosima („Sl. novine FBiH“, br. 29/03 i 42/11).

### Član 2. (Konfiguracija helikoptera)

Dobavljač je saglasan da proda, a Kupac je saglasan da kupi višenamjenski civilni helikopter sa pratećom opremom (u daljem tekstu: Helikopter) i pripadajuću opremu i usluge u količinama i po dogovorenim jediničnim i ukupnim cijenama, kako je navedeno u ponudi Dobavljača, Dodatku 1 – Konfiguracija Helikoptera, Dodatku 2 - Slike i tehničke karakteristike ponuđene robe po zahtjevu TD, kao i svim eventualnim izmjenama i dopunama ovog Ugovora.

- a. **Detaljna konfiguracija:** Dodatak 1 – Konfiguracija Helikoptera sa Dodatkom 2 - Slike i tehničke karakteristike ponuđene robe po zahtjevu tenderske dokumentacije definišu specifikacije i opremu Helikoptera, komplet dodataka i prilagođavanje, a koje je prihvatio Kupac u tenderskoj ponudi Dobavljača. Dodatak 1 sa Dodatkom 2, potpisani od strane Kupca, zajedno čine detaljnu konfiguraciju (u daljem tekstu: Detaljna konfiguracija) za Helikopter. Kupac će dostaviti potpisanu Detaljnu konfiguraciju najkasnije u roku od 15 (petnaest) dana, od dana potpisivanja ugovora, kao potvrdu finalne konfiguracije Helikoptera.

- b. Kasna konfiguracija:** Ako Kupac ne dostavi Detaljnu konfiguraciju u rokovima navedenim u Tački a. ovog člana, smatrat će se da je kasnio (u daljem tekstu: Kasna konfiguracija) i Dobavljač može po svom nahođenju promijeniti datum spremnosti za inspekciju i naplatiti Kupcu troškove nošenja inventara, hangara i održavanja koje je imao Dobavljač zbog toga što je došlo do kašnjenja u dostavljanju potpisane i ovjerene Detaljne konfiguracije (Dodatak 1 i Dodatak 2).
- c. Izmjene konfiguracije:** Ugovorne strane će se saglasiti sa bilo kojom izmjenom Detaljne konfiguracije Helikoptera koju je zatražio Kupac i to u pisanoj formi izmjene ovog Ugovora i to može rezultirati prilagođavanjem Detaljne konfiguracije, roka isporuke i cijene Helikoptera. U slučaju potrebe Kupca za izmjenama konfiguracije Helikoptera, ista se može napraviti najkasnije u roku od 180 (stotinuosamdeset) dana do trenutka planirane inspekcije.

Kupac je dužan 12 (dvanaest) mjeseci nakon potpisa ugovora dostaviti detaljnu specifikaciju opreme za koju je potrebno ugraditi pripremljene elemente (eng. *provisions*) navedene u Dodatku 1 u dijelu „Prilagođavanje“ pod rednim brojevima: 26, 27, 28 i 29, također navedene u Dodatku 3 pod rednim brojevima: 26, 27, 28 i 29.

### Član 3. (Konfiguracija Proizvodnje)

Osnovni Helikopter će biti proizveden u plovidbenoj konfiguraciji u skladu s konfiguracijom proizvodnje Proizvođača u vrijeme proizvodnje za odabrani model Helikoptera (u daljem tekstu: Konfiguracija proizvodnje).

Dobavljač jednostrano zadržava pravo da revidira Konfiguraciju proizvodnje u bilo koje vrijeme kako bi bila u skladu s propisima nadležnih za civilno zrakoplovstvo ili Proizvođačevim trenutnim zahtjevima kada je riječ o proizvodnji, dizajnu ili inženjeringu.

Dobavljač zadržava pravo da izmijeni mjesec u kojem će se izvršiti inspekcija i/ili kupovnu cijenu kao rezultat revizije konfiguracije proizvodnje od strane Proizvođača.

Dobavljač će obavijestiti Kupca čim to bude izvodljivo ako se desi da promjene u proizvodnji utiču na mjesec inspekcije kako je definisano u Članu 7.

Kupac se slaže da Dobavljač ne prihvata nikakvu odgovornost prema Kupcu ako dođe do bilo kakvih kašnjenja neophodnih zbog izmjena u Konfiguraciji proizvodnje.

Strane se moraju usaglasiti o svakom povećanju kupoprodajne cijene do kojeg može doći zbog izmjene Konfiguracije proizvodnje u pisanoj dopuni ovog Ugovora. Konfiguracija proizvodnje se može razlikovati od specifične Detaljne konfiguracije Kupca.

### Član 4 (Cijena)

Ukupna ugovorena cijena za predmet ovog ugovora iz odredaba Člana 1. iznosi 35.497.800,00 KM (slovima: tridesetpetmilionačetristodevedesetsedamhiljadaosamsto KM) sa obračunatim porezom na dodatnu vrijednost (PDV), odnosno 30.340.000,00 KM (slovima: tridesetmilionačetristočetdesethiljadakonvertibilnihmaraka), bez obračunatog poreza na dodatnu vrijednost (PDV-a), a sve u skladu sa uslovima iz tenderske dokumentacije.

Ugovorena cijena je fiksna i ona se ne može mijenjati za vrijeme trajanja ovog Ugovora, osim u slučajevima predviđenim Članom 75. Zakona o javnim nabavkama ("Službeni glasnik Bosne i Hercegovine", br. 39/2014 i 59/2022) i odredbom Člana 3. ovog Ugovora.

**Član 5.**  
**(Način plaćanja)**

Kupac će za kvalitetno i blagovremeno izvršene obaveze iz ovog Ugovora, plaćanje izvršiti na sljedeći način:

- a. Iznos od 12.424.230,00 KM, odnosno 35 % od ukupne vrijednosti ugovora, Kupac će Dobavljaču izvršiti u roku od 30 dana od dana obostranog potpisivanja ugovora, prijema predračuna, te bezuslovne bankarske garancije za obezbjeđenje avansa. U skladu sa odredbama Pravilnika o primjeni Zakona o porezu na dodatnu vrijednost Bosne i Hercegovine, avansna faktura će se izdati nakon priliva sredstava. Kupac je dužan u roku do 30 dana nakon zaključenja ugovora, izvršiti uplatu avansa na sljedeći način:
  1. Iznos od 4.500.000,00 KM na račun BOSNA BANK INTERNATIONAL d.d. Sarajevo, broj računa: .....
  2. Iznos od 7.924.230,00 KM na račun UNICREDIT banka d.d. Sarajevo – Filijala Zenica, broj: .....
- b. Drugi dio iznosa od 21.298.680,00 KM sa PDV-om, odnosno 60% od ukupne vrijednosti ugovora, potrebno je uplatiti u roku do 15 dana od dostavljanja Zapisnika o kvalitativnom i kvantitativnom prijemu Helikoptera, te dostavljanja predračuna sa naznačenim ostatkom iznosa za uplatu. Kupac će izvršiti uplatu navedenog iznosa u ovom članu na račun Dobavljača kod BOSNA BANK INTERNATIONAL d.d. Sarajevo, broj računa: .....
- c. Ostatak iznosa, tj. 1.774.890,00 KM sa PDV-om, odnosno 5% ukupne vrijednosti ugovora Kupac će platiti u roku od 15 dana od dostavljanja Zapisnika o kvalitativnom i kvantitativnom prijemu Helikoptera sa ugrađenom opremom koja je definisana u Dodatku 3 na paritetu aerodrom Sarajevo. Kupac će izvršiti uplatu navedenog iznosa u ovom članu na račun BOSNA BANK INTERNATIONAL d.d. Sarajevo, broj računa: .....
- d. Po prijemu uplate iz Tačke b. ovog člana, u roku do 7 dana, izvršit će se uvozna carinska procedura, Dobavljač će uplatiti poreske obaveze pri uvozu robe, stornirat će se izdati avansni račun, te će se izdati originalna faktura fiskalnim računom u iznosu 95% ugovorene vrijednosti. Dobavljač će dostaviti dokumentaciju u skladu sa EASA pravilima za prijenos vlasništva za potrebe registracije Helikoptera od strane kupca u civilni registar BHDCA.
- e. Po prijemu uplate iz Tačke c. ovog člana, u roku do 7 dana, izvršit će se uvozna carinska procedura za opremu koja je ugrađena, Dobavljač će uplatiti poreske obaveze pri uvozu robe, te će se izdati originalna faktura sa fiskalnim računom u iznosu 5% ugovorene vrijednosti. Dobavljač će Kupcu dostaviti tzv. STC (Supplement Type Certificate) i obrazac Form 52 - Part 145 (Release to Service Certificate) za sve ugrađene dijelove opreme navedene u Dodatku 3.
- f. S obzirom na to da je Proizvođač Helikoptera koji Dobavljač isporučuje iz SAD-a, te sukladno ugovorenom roku isporuke Helikoptera od dana potpisivanja ugovora te uplate avansa (24 mjeseca), ugovorne strane su saglasne da će se eventualne kursne razlike

između Konvertibilne marke i US aplicirati na ostatak uplata, a što će se utvrđivati po srednjem tečaju Centralne banke BiH, a sve u skladu sa Članom 75. ZJN.

Troškovi transfera novčanih sredstava su na teret Kupca.

#### Član 6. (Način fakturisanja)

Fakturisanje će se vršiti sukcesivno u 2 (dvije) faze, i to:

- a. I (prva) faza: pri isporuci predmeta nabavke Ugovora (Helikoptera) na Aerodrom Sarajevo, Kanton Sarajevo, Bosna i Hercegovina. U skladu sa Zakonom o fiskalnim sistemima („Sl.novine FBiH broj: 81/09) i Zakona o porezu na dodatnu vrijednost BiH („Sl.novine BiH, broj: 93/2005) originalna faktura sa fiskalnim računom će se izdati nakon priliva drugog dijela iznosa od 60%, čime će sa ukupno fakturirati 95% ukupne vrijednosti predmetnog ugovora.
- b. II (druga) faza: pri isporuci predmeta nabavke Ugovora (Helikoptera) nakon izvršene ugradnje i EASA certifikacije opreme definisane u Dodatku 3, koja će se ugraditi u Helikopter u Europskom centru Proizvođača za ugradnju i certificiranje dodatne opreme, u skladu sa EASA standardima, u trenutku kada se Helikopter kompletiran isporuči na Aerodrom Sarajevo, Kanton Sarajevo, Bosna i Hercegovina. U skladu sa Zakonom o fiskalnim sistemima („Sl.novine FBiH broj: 81/09) i Zakona o porezu na dodatnu vrijednost BiH („Sl.novine BiH, broj: 93/2005) originalna faktura sa fiskalnim računom će se izdati nakon priliva ostatka iznosa, odnosno 5% ukupne vrijednosti predmetnog ugovora.

#### Član 7. (Prihvata i isporuka)

Dobavljač će Kupcu dostaviti Helikopter na pregled u plovidbenom stanju kao što je navedeno u Detaljnoj konfiguraciji, najkasnije u roku od 24 (slovima: dvadesetčetiri) mjeseca od momenta potpisivanja ugovora +30 (trideset) dana (grejs period).

Radi potvrđivanja narudžbe prema Proizvođaču sa elementima koji nisu definisani zahtjevima u tenderskoj dokumentaciji kao što su boja Helikoptera, oznaka Helikoptera, boje enterijera, tehničkih elemenata, frekvencije, dodatna oprema u skladu sa propisima, uvodi se grejs period od +30 (trideset) dana, za izvršavanje ugovornih obaveza.

- a. **Obavijest o spremnosti za inspekciju:** Dobavljač će dostaviti Kupcu pismenu obavijest o datumu i lokaciji kada će Helikopter biti spreman za inspekciju (u daljem tekstu: Datum spremnosti za inspekciju), najkasnije u roku od petnaest (15) kalendarskih dana prije posljednjeg dana u mjesecu kada je inspekcija zakazana.
- b. **Inspekcija:** Kupac može pregledati i testirati Helikopter u objektu Dobavljača (u daljem tekstu: Inspekcija) najkasnije do deset (10) kalendarskih dana nakon Datuma spremnosti za inspekciju. Tokom inspekcije, ako Kupac utvrdi da Helikopter nije usklađen sa uslovima ovog Ugovora, Kupac će Dobavljaču u pisanoj formi navesti svaku neusklađenost u vezi sa Helikopterom. Dobavljač će otkloniti takvu neusklađenost, osim ako se ugovorne strane ne dogovore drugačije u pisanom obliku, prije nego što Kupac prihvati Helikopter. Kupac može odlučiti da odustane od inspekcije i prihvati Helikopter kako je opisano u Članu 7. Tačka c.

- c. Prihvatanje:** Kupac će prihvatiti Helikopter putem izvršenja Potvrde o prijemu ili Potvrde o prihvatanju sa odustajanjem od inspekcije (zajedno: Dokument o prihvatanju). Izvršenje Dokumenta o prihvatanju od strane Kupca predstavlja prihvatanje Helikoptera i potvrdu da je Helikopter u skladu sa svim uslovima ovog Ugovora. Datum izvršenja Dokumenta o prihvatanju od strane Kupca je datum prihvatanja (u daljem tekstu: Datum prihvatanja). Ako Kupac ne uspije da pregleda i prihvati Helikopter u roku od najkasnije deset (10) kalendarskih dana nakon datuma spremnosti za inspekciju, iz razloga koji se ne mogu pripisati Dobavljaču, Dobavljač će po sopstvenom nahođenju, imati pravo da raskine ovaj Ugovor i zadrži sva plaćanja koja su prethodno izvršena Kupcu kao likvidiranu štetu, a ne kao penale, i izvršit će procjenu troškova nošenja inventara i troškove održavanja, prema potrebi.

Dobavljač je dužan da isporuku izvrši u roku do 24 (dvadesetčetiri) mjeseca od dana ispunjenja sljedećih uslova:

- a. Obostranog potpisivanja ugovora,
- b. Uplate avansa u skladu sa Članom 5, Tačka a. ovog ugovora,
- c. Dostave potpisane izjave krajnjeg korisnika o upotrebi predmeta Ugovora,
- d. Izjava o vizuelnom izgledu sa dostavom elektronskih fajlova oznaka Kupca,
- e. Izjava o prihvatanju uslova obuke, detaljno opisane u odredbama Člana 14. ovog ugovora,
- f. Izjava o prihvatanju načina vršenja tehničke i finalne inspekcije,
- g. Potpisivanju Detaljne konfiguracije (Dodatak 1 i Dodatak 2),
- h. Obaveze Kupca da za stavku pod rednim brojem 26. (Pripremnih elementi za 2Ghz zračni odašiljač) navedene u dijelu Dodatka 1 "Prilagođavanje", dostavi odobrenje Regulatorne agencije za komunikacije (RAK) za korištenje frekvencije.
- i. Dostaviti spisak članova komisije za inspekciju Helikoptera (ime i prezime, broj telefona i kopija pasoša),
- j. Dostaviti spisak kandidata za obuku (ime i prezime, broj telefona i kopija pasoša).

Dobavljač se obavezuje dostaviti prijedloge izjava za tačke d. do f. ovog Člana, 7 dana od potpisivanja Ugovora, a Kupac se obavezuje dostaviti potpisane izjave u roku do 30 dana od dana obostranog potpisivanja Ugovora. U slučaju kašnjenja u izvršenju gore navedenih uslova, rok za isporuku se pomjera za broj dana za koji je došlo do kašnjenja u dostavljanju potrebne dokumentacije.

U dijelu Dodatka 1 "Prilagođavanje", pod red. br. 23. predviđena je ugradnja pripremnih elemenata za \_\_\_\_\_, te se Kupac obavezuje da Dobavljaču blagovremeno dostavi svoju \_\_\_\_\_ radio stanicu na ugradnju.

Datum ili period isporuke treba računati od datuma kada počinju obaveze Dobavljača u pogledu isporuke (tj. od ispunjenja uslova navedenih u ovom Članu), pa sve dok se roba ne isporuči na krajnje odredište, u stanju spremnom za korištenje.

Mjesto isporuke: na paritetu DDP Aerodrom Sarajevo, Kanton Sarajevo, Bosna i Hercegovina (Incoterms 2010).

#### **Član 8. (Tehnički prijem)**

Kupac će pregledati i testirati Helikopter na lokaciji po dogovoru, te ukoliko utvrdi da postoje neka odstupanja u pogledu tehničkih karakteristika, Kupac će Dobavljaču u pisanoj formi navesti sve neusklađenosti u vezi sa Helikopterom.

Štručna komisija iz oblasti avijacije, formirana od strane Kupca će izvršiti kvalitativni i kvantitativni prijem predmetne robe i o tome sačiniti zapisnik.

Dobavljač će Kupcu dostaviti pismenu obavijest o datumu i lokaciji kada će Helikopter biti spreman za pregled.

Kupac može odbiti neku robu ili dio robe koja ne uspije proći prijemni pregled ili koja nije u skladu sa specifikacijama. Dobavljač je dužan otkloniti problem ili zamijeniti odbijenu robu ili dijelove robe ili napraviti neophodne izmjene kako bi se zadovoljile specifikacije, a zatim ponoviti pregled, nakon što obavijesti Kupca o mjestu i vremenu provođenja istog. Nakon izvršenog pregleda sačinije se Zapisnik o kvalitativnom i kvantitativnom pregledu robe potpisan od stručne komisije formirane od strane Kupca.

Tehnički prijem Helikoptera iz Člana 1. ovog ugovora će izvršiti u fazama kako slijedi:

- a. Dobavljač će obezbijediti Kupcu tehnički prijem Helikoptera i opreme na lokaciji Proizvođača u SAD, prije isporuke. Tehnički prijem podrazumijeva pregled Helikoptera i opreme od strane predstavnika Kupca radi utvrđivanja usklađenosti sa zahtjevima Kupca. Troškove smještaja i puta predstavnika Kupca snosi Kupac. Kupac će sačiniti zapisnik o pregledu robe, te će isti biti osnov za daljnja postupanja po ugovoru.
- b. Štručna komisija iz oblasti avijacije, formirana od strane Kupca će izvršiti kvalitativni i kvantitativni prijem predmetne robe na lokaciji Proizvođača u Češkoj, neposredno prije isporuke i o tome sačiniti zapisnik. Tehnički prijem podrazumijeva komisijski kvalitativni i kvantitativni pregled Helikoptera i opreme od strane predstavnika Kupca radi utvrđivanja usklađenosti sa svim zahtjevima Kupca. Troškove smještaja i puta predstavnika Kupca snosi Kupac. Kupac će sačiniti zapisnik o pregledu robe, te će isti biti osnov za daljnja postupanja po ugovoru.
- c. S obzirom na to da će nakon isporuke Helikoptera od strane Dobavljača, na istome biti izvršene neophodna ugradnja određene opreme navedene u poglavlju "Prilagodavanje" Dodatka 1, posebno navedene u Dodatku 3, a sve u skladu sa specifikacijom ponude, za istu će se izvršiti dva dodatna prijema od strane Kupca, i to jedan u Proizvođačevom odobrenom evropskom centru, a drugi u BiH, tj. na aerodromu Sarajevo prilikom predaje Helikoptera na korištenje.

Dobavljač je obavezan u što kraćem roku otkloniti sve eventualne nedostatke.

Troškove osiguranja, leta i pilota za prelet Helikoptera do Proizvođačevog centra u Europi i nazad obezbjeđuje Kupac.

#### **Član 9.**

##### **(Garancija za Helikopter, motor i svu dodatnu opremu)**

Dobavljač daje garanciju za kvalitet i funkcionalnost na svu isporučenu robu i opremu u trajanju od minimalno 1.000 (hiljadu) sati naleta ili 36 (tridesetšest) mjeseci, šta god da nastupi prije, za sve dijelove i komponente Helikoptera, dijelove i komponente pogonske grupe i dijelove i komponente isporučene dodatne opreme.

Dobavljač se obavezuje da će u toku garantnog perioda, odgovoriti na primjedbu Kupca odmah, a najkasnije u roku od 2 (dva) radna dana od prijema primjedbe, te otkloniti neispravnost koja podliježe uslovima garancije u najkraćem roku.

Ako kvar nije posljedica nestručnog rukovanja od strane Kupca, Dobavljač će kvar otkloniti o svom trošku, osim ako je kvar nastao u skladu sa uslovima opisanim u Članu 13. ovog ugovora. Sve troškove opravdane reklamacije snosi Dobavljač, a neopravdane snosi Kupac.

Garantni rok za izvršene usluge otklanjanja neispravnosti u toku garantnog roka za Helikopter, motor i dodatnu opremu je od najmanje jedne (1) godine ili do isteka garantnog roka za Helikopter, motor i dodatnu opremu, što može biti i duže.

#### **Član 10.** **(Garancija za dobro izvršenje ugovora)**

Dobavljač je dužan, u roku od 15 (petnaest) dana po obostranom potpisivanju Ugovora, Kupcu dostaviti originalnu neoštećenu garanciju za uredno izvršenje ugovora u obliku bezuslovne bankarske garancije u iznosu do 10% od vrijednosti ugovora („vrijednost ugovora“ podrazumijeva ukupnu cijenu ponude sa uključenim PDV-om) i sa klauzulom plativosti korisnika garancije u cijelosti i bez prava prigovora. Rok važnosti garancije je: rok izvršenja ugovornih obaveza +30 (trideset) dana.

Kupac će kod poslovne banke (garanta) koja je izdala garanciju za uredno izvršenje Ugovora izvršiti protest ukupnog iznosa na koji glasi garancija shodno odredbama Zakona o obligacionim odnosima i odredbama Pravilnika o obliku garancije za ozbiljnost ponude i izvršenje Ugovora ("Službeni glasnik BiH" br. 90/14), za potrebe naknade štete i troškova, koje Kupac može imati ukoliko Dobavljač prekrši Ugovor o nabavci do isteka roka važnosti garancije za robu i opremu koja je predmet ovog Ugovora +30 (trideset) dana. Do dostavljanja bankarske garancije Ugovor se zaključuje pod odložnim uslovom.

Ugovorne strane su saglasne da ukoliko Dobavljač u roku od 30 (trideset) dana ne dostavi garanciju kako je navedeno u prvom stavu ovog člana, Kupac će smatrati Ugovor apsolutno ništavnim.

Prethodni stav ovog člana se neće primijeniti, ukoliko je do nastupanja okolnosti došlo uslijed djelovanja više sile, opisanih Članom 13. ovog ugovora.

Period važenja garancije mora biti najmanje 30 (trideset) dana duži od dana isporuke predmeta javne nabavke. Navedenu bankarsku garanciju Dobavljač je obavezan da dostavi u originalu, u formi datoj u Aneksu VIII Tenderske dokumentacije.

Pokriće iz bankarske garancije ne oslobađa Dobavljača odgovornosti sve do namirenja stvarne štete.

Ukoliko ne nastupi niti jedan od slučajeva koji bi zahtijevao realizaciju garancije za uredno izvršenje posla, Kupac će izvršiti povrat garancije za uredno izvršenje posla na zahtjev Dobavljača u roku od deset (10) dana od dana podnošenja zahtjeva.

#### **Član 11.** **(Garancija za avansno plaćanje)**

Dobavljač je obavezan da dostavi bankarsku garanciju za avansno plaćanje u roku 30 dana od potpisa Ugovora.

Bankarska garancija mora biti sa klauzulom plativosti korisnika garancije i bez prava prigovora, sa rokom važnosti: rok izvršenja ugovornih obaveza +30 (trideset) dana (grejs period).



**Član 12.**  
**(Ugovorne kazne)**

U slučaju da dođe do prekoračenja roka za isporuku robe koja je predmet ovog Ugovora, Dobavljač se obavezuje da Kupcu plati ugovornu kaznu. Kašnjenje u realizaciji obaveza iz Ugovora povlači obračun penala u visini od 0,1% ukupne vrijednosti isporuke za svaku sedmicu kašnjenja od ugovorene vrijednosti Ugovora, s tim da ukupan iznos kazne (vrijednost naplaćenih penala) može iznositi maksimalno do 10% ugovorene vrijednosti Ugovora.

Ukoliko do prekoračenja roka za isporuku dođe zbog nastupanja okolnosti na koje Dobavljač nije mogao uticati niti ih predvidjeti, Dobavljač neće odgovarati za prekoračenje roka za isporuku, te se u tom slučaju ne primjenjuju ugovorne kazne.

U skladu sa odredbama Člana 61. Zakona o obligacionim odnosima, ugovorne kazne se mogu primijeniti ukoliko je bilo koja ugovorna strana dovela u bitnu zabludu drugu ugovornu stranu.

Ugovoreni penali po ovom Ugovoru ne isključuju mogućnost Kupca da koristi prava utvrđena безусловnom garancijom za uredno izvršenje Ugovora.

U slučajevima odustanka od ugovora od strane Dobavljača, započinjanja isporuke robe uz prekoračenje roka izvršenja ugovorene obaveze ili kada je iznos obračunatih penala dostigao iznos do 10% ugovorene vrijednosti ovog Ugovora i u situacijama neispunjavanja ugovorenih obaveza, Kupac može raskinuti ovaj Ugovor uz naplatu ispostavljenih garancija (za dobro izvršenje ugovora i avansne garancije) i ugovorne kazne, u visini do 10% ukupno ugovorene vrijednosti ovog Ugovora.

**Član 13.**  
**(Viša sila)**

Dobavljač neće biti odgovoran za bilo kakvo kašnjenje i neće se smatrati da krši obaveze preuzete ugovornim odnosom, u slučaju da je to kašnjenje ili neispunjavanje obaveza uzrokovano okolnostima koje mu se ne mogu staviti na teret, kao što su, a ne ograničavajući se na, ratno stanje, ustanak, pobuna, embargo ili trgovinska ograničenja, akti i mjere izdate od strane ili u ime bilo kojeg državnog organa, (uključujući, ali ne ograničavajući se na prioritetna prava na dodjelu Vlade SAD-a), zakona ili propisa, poštivanja bilo kojih propisa civilnih ili vojnih vlasti, kašnjenje ili poteškoće u transportu, oscilacije kursa USD/BAM, nestašice goriva, kašnjenje Proizvođača zbog djelovanja više sile ili nepredvidivih događaja, požar, eksplozija, zemljotres, poplava, zdravstvene epidemije, vulkanske erupcije, karantin, nemogućnost slijetanja zbog loših vremenskih uslova (snježne padavine, magla, ledena kiša, niska baza oblaka, snažni vjetrov i sl.), štrajkovi ili drugi radni sporovi, tehničke promjene zbog sigurnosti letenja (AD note Proizvođača).

Ukoliko dođe do jednog ili više događaja, Dobavljač će pismeno obavijestiti Kupca i smatrat će se da je očekivani datum prihvatanja ili ispunjenja obaveze produžen za vremenski period koji nije kraći, a niti duži od trajanja navedenih događaja.

Ako neispunjenje obaveze ili kašnjenje u ispunjenju obaveze nastupi zbog okolnosti više sile, Kupac će Dobavljaču produžiti rok isporuke ugovornih obaveza.

**Član 14.  
(Obuke)**

Dobavljač će omogućiti Kupcu obuku na lokaciji ovlaštene organizacije za obuku. Obuka pilota i vazduhoplovno-tehničkog osoblja će se izvršiti na sljedeći način, u skladu sa uslovima iz Tenderske dokumentacije:

- a. obuka za upravljanje predmetnim tipom helikoptera (Type Rating) za četiri (4) pilota,
- b. obuka za održavanje predmetnog tipa helikoptera (Type Training) po sistemu helikoptera i motora (B1) za dvije (2) osobe,
- c. obuka za održavanje sistema avionike (B2) za jednu (1) osobu,
- d. osposobljavanje operatera za rad na vanjskom vitlu za spašavanje, za jednu (1) osobu i obuka tehničara za održavanje vanjskog vitla za spašavanje za jednu (1) osobu,
- e. obuka za korištenje opreme iz poglavlja "Prilagođavanje" Dodatka 1, posebno navedene u Dodataku 3.

Uspješno obavljena obuka biće evidentirana u ovlaštenom centru za obuku, te izdavanjem odgovarajućih validnih certifikata Proizvođača Helikoptera / opreme.

Ova obuka je uključena u ukupnu vrijednost Ugovora, kako je to navedeno u Tenderskoj dokumentaciji. Sve troškove koje Kupac može imati tokom obuke (kao što su troškovi smještaja, puta i ostalo) snosi Dobavljač.

Plan i program obuke, kao i minimalne zahtjeve za polaznike obuke Dobavljač će dostaviti Kupcu u roku od 120 (stotinudvadeset) dana od dana potpisivanja Ugovora. Radi procesa obezbjeđivanja viza, kao i rezervacije termina obuke Kupac je dužan dostaviti najkasnije u roku do 180 (stotinosamdeset) dana spisak polaznika (ime i prezime, kopija pasoša i ostalu dokumentaciju koju bude zahtijevao centar za obuku).

Kupac je obavezan da obezbijedi da polaznici obuke budu spremni za pohađanje obuke 6 (šest) mjeseci prije isporuke, ali ne duže od 12 (dvanaest) mjeseci nakon isporuke Helikoptera.

Kupac je dužan da obezbijedi polaznike obuke koji zadovoljavaju minimalne kvalifikacione uslove da bi pristupili obuci na akademij za obuku Proizvođača.

U slučaju da polaznik ne okonča uspješno obuku, sve troškove obuke (uključujući troškove smještaja, puta i ostalo) za ponovnu obuku i/ili polaganje snosi Kupac.

Kupac se slaže da će se pridržavati Dobavljačeve Politike otkazivanja/izmjena kao što je navedeno u nastavku.

<b>Politika otkazivanja/izmjena</b>	
Više od 30 kalendarskih dana od datuma početka registriranog kursa obuke	Bez penala
16 - 30 kalendarskih dana od datuma početka registriranog kursa obuke	10% naknada za kurseve obuke
7 - 15 kalendarskih dana od datuma početka registriranog kursa obuke	25% naknada za kurseve obuke
Manje od 7 kalendarskih dana od datuma početka registriranog kursa obuke	Gubi se mjesto za obuku. Buduća obuka se mora platiti.

**Član 15.**  
**(Tehnička dokumentacija)**

Ponuđena cijena obuhvata dokumentaciju za Helikopter, motor i svu dodatnu opremu i to: pristup ažurnoj dokumentaciji najmanje u periodu od 3 (tri) godine od momenta isporuke robe za svu navedenu dokumentaciju i to najmanje: Katalog dijelova Helikoptera i motora, Uputstvo za održavanje Helikoptera, Uputstvo za održavanje motora, Uputstvo za letenje, Katalog specijalnih alata, Uputstvo standardnih procedura, Servisni bilteni, Obavezni bilteni za Helikopter, motor i svu ugrađenu i obezbijeđenu opremu.

Pristup dokumentaciji podrazumijeva, bilo internet pristup ažurnoj navedenoj dokumentaciji, bilo blagovremeno dostavljanje ažurne dokumentacije u štampanoj formi, ukoliko Proizvođač nema opciju Internet pristupa. Izuzetno se ovo ne odnosi na Uputstvo za letenje sa dodacima, kojeg je Dobavljač dužan obezbijediti i u štampanoj formi u navedenom periodu.

**Član 16.**  
**(Dokumentacija)**

Dobavljač je preko Proizvođača dužan u trenutku isporuke Helikoptera Kupcu dostaviti minimalno sljedeću dokumentaciju:

- a. Garantni list Proizvođača ili Dobavljača Helikoptera i sve opreme navedene u Aneksu III - Obrazac tehničkih karakteristika "traženo/ponuđeno" Tenderske dokumentacije;
- b. Važeći tipski certifikat za Helikopter priznat od strane Evropske agencije za sigurnost zračne plovidbe - EASA (European Aviation Safety Agency);
- c. Važeći certifikat za ugradnju u Helikopter, za svu dodatnu opremu ugrađenu u Helikopter ili predviđenu za ugradnju, kao i za sve rezervne dijelove za Helikopter priznat od strane EASA, u trenutku isporuke;
- d. Helikopter i sva oprema u trenutku isporuke dostavljaju se sa: helikopterskom knjižicom, motorskom knjižicom i odgovarajućim kartonima podataka u skladu sa propisima EASA.

Navedeni certifikati su neophodni kako bi Kupac mogao registrovati Helikopter kod BHANSA.

S obzirom na to da će se ugradnja određenog dijela opreme navedene u Dodatku 3 izvršiti na Helikopteru u odobrenom Proizvođačevom centru u Europi, Kupac se obavezuje dostaviti tzv. produženje COE, potvrdu registracije u BHANSA sa i ARC (Airworthines Review Certificate), kako bi se izvršio prelet sa Helikopterom na lokaciju Proizvođačevog centra u Europi.

Po okončanju ugradnje dijela opreme navedeneog u Dodatku 3, Dobavljač će Kupcu dostaviti tzv. STC (Supplement Type Certificate) i obrazac Form 52 - Part 145 (Release to Service Certificate) za sve ugrađene dijelove opreme navedene u Dodatku 3.

**Član 17.**  
**(Pristup tehničkoj dokumentaciji)**

Dobavljač je preko Proizvođača obavezan u trenutku isporuke predmeta Ugovora ili najkasnije u roku od 60 (šezdeset) dana od dana isporuke, omogućiti Kupcu internet pristup u trajanju do 3 (tri) godine, minimalno sljedećoj ažurnoj tehničkoj dokumentaciji:

- a. Katalog dijelova Helikoptera i motora, Uputstvo za održavanje Helikoptera, Uputstvo za održavanje motora,
- b. Uputstvo za održavanje komponenti, Uputstvo za opravku, Uputstvo za letenje, Katalog specijalnih alata,

- c. Uputstvo standardnih procedura, Servisni bilteni, Obavezni bilteni za Helikopter, motor i svu ugrađenu i obezbjeđenu opremu.

**Član 18.**  
**(Povjerljivost informacija)**

Dobavljač nije ovlašten za davanje informacija o predmetu ovog ugovora sredstvima informisanja, već je za davanje ovih informacija ovlašten samo Kupac.

U skladu sa Zakonom o zaštiti ličnih podataka („Sl.glasnik BiH“, br. 49/06, 76/11 i 89/11), Dobavljač se obavezuje da će zaštititi lične podatke polaznika obuke u pogledu obrade koji se na njih odnose, te ih neće odavati trećim licima bez prethodnog ovlaštenja.

**Član 19.**  
**(Sukob interesa)**

Dobavljač nema pravo da zapošljava, u svrhu izvršenja predmetnog ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažovala komisija za nabavke, najmanje šest mjeseci po zaključenju ugovora, odnosno od početka realizacije ugovora.

**Član 20.**  
**(Slučajevi kršenja i raskida Ugovora)**

U slučaju da Kupac prekrši, poništi ili raskine ovaj Ugovor iz bilo kog razloga ili (i) Kupac ne izvrši bilo koje uplate ili ne plati druge troškove za koje je odgovoran prema ovom Ugovoru kada one dospijevaju, Dobavljač ima pravo raskinuti ovaj Ugovor i zadržati sve uplate koje je prethodno izvršio Kupac i to će se smatrati naknadom štete, a ne penalom. U slučaju da Dobavljač raskine ovaj Ugovor iz bilo kog razloga osim gore navedenih, na Dobavljaču je isključiva odgovornost da vrati sve uplate koje je izvršio Kupac za Helikopter ili zalihe i usluge koje nisu isporučene.

**Član 21.**  
**(Usklađenost sa zakonima / propisima o izvozu države Proizvođača)**

Ugovorne strane potvrđuju da je izvršenje ovog Ugovora, uključujući sva plaćanja izvršena prema ovom Ugovoru, regulisano važećim pravilima i propisima koji regulišu transfer novca i svim povezanim zakonima protiv pranja novca. Kao takav, Kupac se slaže da će saradivati sa Dobavljačem i pružiti dodatne informacije koje Dobavljač zahtijeva u skladu sa Dobavljačevim zakonskim obavezama. Dobavljač može zatražiti od Kupca da pruži informacije uključujući, ali ne ograničavajući se na, izvore sredstava i subjekte povezane sa novcem plaćenim u izvršenju ovog Ugovora. Kupac potvrđuje da neispunjavanje ovih zahtijeva za usklađenost ili neuspjeh Kupca da saraduje s Dobavljačem u ovim naporima može rezultirati kašnjenjem ili raskidom ovog Ugovora prema isključivom nahođenju Dobavljača.

Strane dalje potvrđuju da proizvodi, usluge i/ili informacije pružene u okviru ovog Ugovora zahtijevaju od obje strane da se pridržavaju važećih zakona, pravila i propisa uključujući, ali ne ograničavajući se na, carinske (uvoz/izvoz) zakone i propise, kao i Američke propise o međunarodnom prometu oružja (ITAR), Propise o izвозnoj administraciji (EAR), Patriotski zakon SAD-a i Američki Zakon o stranoj korupciji (FCPA), i slične zakone svih takvih jurisdikcija u koje će se Helikopter isporučivati i/ili gdje će se njime upravljati.

- a. Odobrenje Vlade:** Kupac je saglasan da će u potpunosti saradivati sa Dobavljačem u cilju dobivanja bilo kakvih državnih odobrenja koja mogu biti potrebna za proizvode, usluge i/ili informacije date u skladu sa ovim Ugovorom. Dobavljač ima pravo da raskine ovaj Ugovor ako nije u mogućnosti da obezbijedi takva odobrenja, i Dobavljač će biti oslobođen obaveze isporuke Helikoptera. Isključiva odgovornost Dobavljača je da vrati sve uplate koje je izvršio Kupac za Helikopter koji nije isporučen. Dobavljač neće biti odgovoran Kupcu za bilo kakav gubitak, trošak ili izdatak koji proističe iz takvog raskida ili neisporuke (uključujući bilo kakvu stvarnu, posljedičnu ili drugu štetu bilo koje vrste).
- b. Potvrda o krajnjoj upotrebi/korisniku:** Kupac će dostaviti popunjen Dodatak 5 - IZJAVA O KRAJNJOJ UPOTREBI I KRAJNJEM KORISNIKU ("Obrazac krajnje upotrebe") najmanje 6 (šest) mjeseci prije prvog kalendarskog dana u mjesecu inspekcije. Ako je datum na ovom Ugovoru u roku od 6 (šest) mjeseci od mjeseca inspekcije kako je navedeno u Članu 7, Kupac će dostaviti popunjen Obrazac za krajnju upotrebu u roku od 14 (četnaest) kalendarskih dana od potpisivanja ovog Ugovora. Ova izjava mora identifikovati namjeravanog (i) krajnjeg korisnika Helikoptera (ime i adresa); (ii) krajnju upotrebu Helikoptera; i (iii) zemlju(e) u kojoj će Helikopter biti registrovan i u kojoj će se njime upravljati. Kupac će dostaviti ažurirane obrasce za krajnju upotrebu ukoliko se takve informacije promijene prije konačne isporuke. Kupac potvrđuje da nemogućnost pružanja ili ažuriranja ovih informacija na vrijeme može dovesti do kašnjenja ili raskida ovog Ugovora prema isključivom nahođenju Dobavljača.

**Član 22.**  
**(Ograničenje odgovornosti).**

Ni u kom slučaju nijedna strana neće biti odgovorna prema ovom sporazumu u skladu sa bilo kojim ugovorom koji se odnosi na nemarno ponašanje, strogu odgovornost, delikt ili drugu pravnu ili legitimnu teoriju za bilo kakve slučajne, posebne, posljedične i/ili kaznene štete bilo koje prirode, koje proizlaze iz ili u vezi sa ovim ugovorom, čak i ako je ta strana bila obaviještena o mogućnosti takve štete. Strane potvrđuju i saglasne su da ograničenja odgovornosti navedena u ovom ugovoru odražavaju raspodjelu rizika koja je navedena u ovom ugovoru i da bi, u odsustvu takvih ograničenja, uslovi ovog ugovora bili bitno drugačiji.

**Član 23.**  
**(Rješavanje sporova)**

Ugovorne strane su saglasne da će svaki spor po predmetu ovog ugovora rješavati sporazumno. U suprotnom, za rješavanje spora nadležan je Općinski sud u Sarajevu, Kanton Sarajevo, Bosna i Hercegovina.

**Član 24.**  
**(Zakon o obligacionim odnosima)**

Ostala pravila koja se tiču zaključenja ugovora i ugovornog odnosa sadržana su u Zakonu o obligacionim odnosima i ugovorne strane su dužne pridržavati se tih propisa.

**Član 25.  
(Ustupanje)**

Kupac neće ustupati nikakva prava vlasništva prema ovom ugovoru bez pisanog pristanka Dobavljača.

**Član 26.  
(Stupanje na snagu)**

Ugovor stupa na snagu danom potpisivanja ovlaštenih predstavnika i traje do realizacije ugovorene vrijednosti, odnosno do izmirenja dužničko-povjerilačkih odnosa. Ovaj ugovor izrađen je u 6 (šest) istovjetnih primjerka, od kojih po 3 (tri) zadržava svaka ugovorna strana.

Dobavljač  
SHOT d.o.o. Zenica

  
direktor Vedran Ključanin

Broj: 24-025-KRI  
Datum: 04.06.2024.

Kupac  
MUP Kantona Sarajevo

  
Ministar Admir Katica

Broj: 06-1-3436-16  
Datum: 04.06.2024.

**Dodaci Ugovoru:**

- Dodatak 1 – Konfiguracija Helikoptera,
- Dodatak 2 – Slike i tehničke karakteristike ponuđene robe po zahtjevu TD,
- Dodatak 3,
- Dodatak 4 – Garancija Proizvođača,
- Dodatak 5 – Izjava krajnjeg korisnika o krajnjoj upotrebi,